

Izvještaj sa 20. sjednice Općinskog vijeća Ilijaš

26. juna 2014. godine u sali Općinskog vijeća održana 20. sjednica Općinskog vijeća. Na Dnevnom redu našlo se 9 tačaka.

Nakon vijećničkih pitanja i inicijativa na trećoj tački Dnevnog rada našao se prijedlog Odluke o davanju saglasnosti za zaključenje Ugovora o korištenju gradskog nogometnog stadiona u Ilijašu. Ovom Odlukom je bilo predviđeno da se da saglasnost Općinskom načelniku da sa Nogometnim klubom "Ilijaš" iz Ilijaša zaključi Ugovor o korištenju Gradskog nogometnog stadiona, na period od 10 godina, bez naknade.

Međutim ovaj prijedlog Odluke nije dobio potrebnu većinu glasova vijećnika.

Nacrt Odluke o priznanjima Općine Ilijaš kao i nacrt Pravilnika o procedurama i kriterijima za dodjelu priznanja Općine Ilijaš stavlja se na Javni uvid u narednih mjesec dana, a bit će organizovana i Javna rasprava,

Nacrtom Odluke predviđena su javna priznanja i odlikovanja Općine Ilijaš i to: Povelja o proglašenju počasnim građaninom, Plaketa, Nagrada – priznanje i Pohvala.

Javna priznanja dodjeljuju se fizičkim osobama i kolektivima s prebivalištem na području Općine Ilijaš a u izuzetnim slučajevima i pojedincima i kolektivima koji nemaju prebivalište, odnosno sjedište na području Općine Ilijaš, po pravilu za Dan Općine Ilijaš radi odavanja priznanja za postignuća i doprinos od posebnog značaja za razvoj i ugled Općine, a naročito za uspjehe u unapređivanju privrede, nauke, kulture, zaštite i unapređivanje okoline, sporta, tehničke kulture, zdravstva i drugih javnih djelatnosti, te za promociju aktivnosti koje su tome usmjerene.

Najviše pažnje vijećnika okupirao je Nacrt Odluke o usvajanju Regulacionog plana "Alića gaj" i Nacrt Odluke o provođenju Regulacionog plana "Alića gaj".

Ovom Odlukom utvrđuju se uslovi korišćenja, izgradnje, uređenja i zaštite prostora i način provođenja Regulacionog plana "Alića gaj" (u daljem tekstu: Plan), a naročito granice prostorne cjeline, urbanističko-tehnički uslovi za izgradnju građevina, uslovi za uređenje građevinskog zemljišta, uređenje zelenih i slobodnih površina, te odnosi prema postojećim objektima.

Nacrt Regulacionog plana "Alića gaj", nacrt Odluke o provođenju Regulacionog plana "Alića gaj" i nacrt Odluke o usvajanju Regulacionog plana "Alića gaj" stavlja se na Javni uvid u periodu od 26.06.2014. do 25.07.2014 godine, a Javna rasprava na nacrt Regulacionog plana "Alića gaj", Nacrt Odluke o provođenju Regulacionog plana "Alića gaj" i Nacrt Odluke o usvajanju Regulacionog plana "Alića gaj" održat će se 01. avgusta (petak) 2014. godine u Sali Općine Ilijaš sa početkom u 14 sati i 30 minuta. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš dostavljaju se Općini Ilijaš, Službi za prostorno uređenje i stambeno komunalne poslove, koja organizuje i sprovodi javnu raspravu.

Na današnjoj sjednici usvojen je i prijedlog Odluke o raspisivanju Javnog konkursa za dodjelu neizgrađenog gradskog građevinskog zemljišta u državnom vlasništvu radi građenja 25 individualnih stambenih objekata, spratnosti: prizemlje plus sprat, čvrsta gradnja u skladu s konceptom Regulacionog plana "Alića gaj".

Početna prodajna cijena za neizgrađeno građevinsko zemljište iznosi 35,00 KM/1m².

Sa učesnicima licitacije čija je ponuda utvrđena kao najpovoljnija zaključit će se odgovarajući ugovor u formi notarski obrađene isprave.

Depozit za učešće u postupku javnog nadmetanja se utvrđuje u iznosu od 10% od početne prodajne cijene građevinske parcele koja je predmet licitacije.

Jedno fizičko lice – pravno lice može licitirati najviše na dvije građevinske parcele.

Na ovoj sjednici usvojeni su i prijedlozi rješenja iz imovinsko-pravnih oblasti.